

Na osnovu člana 9., a u vezi sa članom 2. Aneksa VIII Općeg okvirnog sporazuma za mir u Bosni i Hercegovini i člana 37. stav 1. i) Poslovnika o radu Predsjedništva BiH ("Službeni glasnik Bosne i Hercegovine", br. 25/2001. od 12. oktobra 2001. godine), Predsjedništvo BiH je na svojoj 119. sjednici, održanoj 21. decembra 2001. godine, donijelo:

O D L U K U

O KOMISIJI ZA OČUVANJE NACIONALNIH SPOMENIKA

Član 1.

Ovom se odlukom utvrđuju osnovni principi i ciljevi djelovanja, reguliraju organizaciona pitanja neophodna za postupanje u realizaciji uloge Komisije za očuvanje nacionalnih spomenika (dalje u tekstu: Komisija), utvrđuju primarni zadaci i ovlaštenja, vrijeme za koje se imenuju članovi Komisije, te definiraju druga pitanja značajna za Komisiju.

Član 2.

Komisija je institucija Bosne i Hercegovine osnovana Aneksom VIII Općeg okvirnog sporazuma za mir u Bosni i Hercegovini.

Član 3.

Sjedište Komisije je u Sarajevu.

Komisija može da organizira obavljanje nekih svojih poslova izvan svog sjedišta.

Član 4.

Komisija će primati i odlučivati o molbama za proglašenje neke imovine nacionalnim spomenikom zbog njenog kulturnog, istorijskog, vjerskog i etničkog značaja, kako je to predviđeno Aneksom VIII Općeg okvirnog sporazuma za mir u Bosni i Hercegovini.

Član 5.

Predsjedništvo BiH imenuje pet članova Komisije bez javnog konkursa.

Članovi Komisije se imenuju za period od pet godina, uz mogućnost njihovog reizbora.

Za člana Komisije može biti imenovana osoba koja posjeduje visokostručne kvalifikacije, potvrđene naučnim radom i drugim vidovima djelovanja koji to potvrđuju, uključujući angažovanje na očuvanju i zaštiti kulturno-istorijskog, vjerskog i drugog materijalno-civilizacijskog nasljeđa.

Članovima Komisije koji nisu državljani Bosne i Hercegovine i članovima njihovih porodica odobrit će se privilegije i imuniteti, u skladu sa članom 3. stav 3., Aneksa VIII Općeg okvirnog sporazuma za mir u Bosni i Hercegovini.

Član 6.

Komisija ima odgovarajuća sredstva i stručno, kompetentno osoblje koje uglavnom odražava etnički sastav Bosne i Hercegovine, kako bi joj pomoglo pri obavljanju dužnosti.

Osobljem rukovodi izvršni dužnosnik kojeg imenuje Komisija.

Član 7.

Komisija usvaja opće akte kojima se propisuje odgovarajuća saradnja s nadležnim tijelima BiH i njenih entiteta.

Član 8.

Komisija se finansira iz Budžeta institucija BiH.

Dodatni će se vidovi finansiranja predvidjeti posebnim internim aktom Komisije na koji saglasnost daje Vijeće ministara BiH.

Materijalno-finansijsko poslovanje Komisije propisat će se Pravilnikom kojeg, uz prethodnu saglasnost Vijeća ministara BiH, donosi Komisija. Sastavni dio tog Pravilnika je akt o plaćama i naknadama članova Komisije i osoblja iste.

Član 9.

Unutrašnja organizacija Komisije propisat će se Pravilnikom o unutrašnjoj organizaciji kojeg donosi Komisija, uz prethodnu saglasnost Predsjedništva BiH, u roku od 60 dana od dana stupanja na snagu ove odluke.

Međunarodna saradnja Komisije propisaće se posebnim aktom kojeg, na prijedlog Komisije, donosi Predsjedništvo BiH.

Član 10.

Procedura donošenja pojedinačnih akata predviđenih članom 5. Aneksa VIII Općeg okvirnog sporazuma za mir u BiH, vezano za član 4. ove odluke, propisaće se Poslovníkom kojeg donosi Komisija.

Član 11.

Ova odluka stupa na snagu danom donošenja, a objavit će se u "Službenome glasniku Bosne i Hercegovine".

Broj: 1-02-01-484/02
Sarajevo, 21.decembra 2001.godine

**PREDSJEDAVALJUĆI
PREDSJEDNIŠTVA BiH
mr. sc. Jozo Križanović**

Na osnovu člana 9, a u vezi sa članom 2. Aneksa VIII Općeg okvirnog sporazuma za mir u Bosni i Hercegovini i člana 37. stav 7. i) Poslovnika o radu Predsjedništva BiH ("Službeni glasnik BiH", br. 25/01), Predsjedništvo Bosne i Hercegovine na 134. sjednici, održanoj 23. aprila 2002. godine donijelo je

ODLUKU O IZMJENAMA I DOPUNAMA ODLUKE O KOMISIJI ZA OČUVANJE NACIONALNIH SPOMENIKA

Član 1.

U Odluci o Komisiji za očuvanje nacionalnih spomenika ("Službeni glasnik BiH", br. 1/02) iza člana 3. dodaje se član 3.a. koji glasi:

"Komisija ima pečat.

Oblik, izgled i upotreba pečata utvrđuje se u skladu sa zakonom."

Član 2.

U članu 5. iza stava 3. dodaju se novi st. 4. i 5. koji glase:

"Član Komisije može zasnovati radni odnos u Komisiji.

Članovi Komisije primaju naknadu za rad u Komisiji, kao i naknadu za ostale troškove vezane za rad u Komisiji."

Dosadašnji stav 4. postaje stav 6.

Član 3.

U članu 6. iza stava 2. dodaje se stav 3., koji glasi:

"Izvršni funkcioner i osoblje Komisije zasnivaju radni odnos u Komisiji".

Član 4.

Član 7. mijenja se i glasi:

"Komisija usvaja opće akte, kojima propisuje:

- način rada Komisije;
- proceduru donošenja pojedinačnih akata predviđenih članom 5. Aneksa VIII Općeg okvirnog sporazuma za mir u Bosni i Hercegovini;
- saradnju sa nadležnim institucijama i tijelima Bosne i Hercegovine i njenih entiteta;
- materijalno-finansijsko poslovanje Komisije, uključujući i visine plaća i drugih naknada članova Komisije i osoblja;
- ostala pitanja od značaja za rad Komisije."

Član 5.

U članu 8. stav 1. tačka na kraju stava zamjenjuje se zarezom i dodaju se riječi:

"i drugih dodatnih vidova finansiranja".

Stav 2. briše se i zamjenjuje se novim stavom 2., koji glasi:

"Za potrebe obavljanja svoje redovne djelatnosti Komisija ima svoj poseban račun."

Stav 3. briše se.

Član 6.

Član 10. briše se.

Član 7.

Ova odluka stupa na snagu danom donošenja i bit će objavljena u "Službenom glasniku BiH".

Broj: 01-799-14/02

Sarajevo, 23. april 2002. godine

Predsjedavajući

Beriz Belkić